

Na osnovu člana 16. stav 4. Zakona o Vladi Zeničko-dobojskog kantona - Prečišćeni tekst ("Službene novine Zeničko-dobojskog kantona", broj 7/10), na prijedlog Ministarstva za poljoprivredu, šumarstvo i vodoprivredu, Vlada Zeničko-dobojskog kantona, na 92. sjednici, održanoj dana 28.01.2021. godine, d o n o s i

ZAKLJUČAK

I.

Utvrđuje se Prijedlog Zakona o izmjenama i dopunama Zakona o šumama.

II.

Prijedlog Zakona o izmjenama i dopunama Zakona o šumama upućuje se u dalju skupštinsku proceduru, po skraćenom postupku.

III.

Zaključak stupa na snagu danom donošenja.

PREMIJER

po Odluci predsjedavajućeg Skupštine

Mirnes Bašić

Broj: 02-_____/21

Datum, 28.01.2021. godine

Zenica

DOSTAVLJENO:

1x Ministarstvo za poljoprivredu, šumarstvo i vodoprivredu,

1x Stručna služba Skupštine,

1x a/a.

Na osnovu člana 37. stav 1. tačka f) Ustava Zeničko-dobojskog kantona, Skupština Zeničko-dobojskog kantona, na sjednici održanoj dana _____.2021. godine, donosi

ZAKON
o izmjenama i dopunama Zakona o šumama

Član 1.

(Dopuna člana 3. Zakona)

- (1) U članu 3. Zakona o šumama („Službene novine Zeničko-dobojskog kantona“, broj: 8/13 i 1/15), iza tačke 19. dodaje se nova tačka 20. koja glasi: „**Fizičko lice registrovano za obavljanje poslova u šumarstvu** je obrt registrovan kod nadležnog općinskog organa za poslove šumarstva koje u stalnom radnom odnosu ima uposlenog najmanje jednog diplomiranog inženjera šumarstva (VII stepen stručne spreme), odnosno mastera diplomiranog inženjera šumarstva (Bolonjski sistem studiranja) sa najmanje dvije godine radnog iskustva u struci.
- (2) Dosadašnje tačke 20.-34. postaju tačke 21.-35.

Član 2.

(Dopune člana 13. Zakona)

- (1) U članu 13. stav (1) iza riječi „pravna“ dodaju se riječi „i fizička lica“, a ostali dio teksta ostaje nepromijenjen.
- (2) U stavu (2) iza riječi „pravna“ dodaju se riječi „i fizička lica“, a ostali dio teksta ostaje nepromijenjen.
- (3) U stavu (3) iza riječi „pravnih“ dodaju se riječi i „fizičkih lica“, a ostali dio teksta ostaje nepromijenjen.

Član 3.

(Izmjena i dopuna člana 17. Zakona)

- (1) U članu 17. dodaje novi stav (2) koji glasi: „Izuzetno, mogu se pomjerati od panja drvo, dijelove stabala i grane posječene u šumi i izvan šume (na poljoprivrednom zemljištu, međama, pojedinačna stabla i sl.) ako je Projektom za izvođenje radova predviđena upotreba savremene mehanizacije (žičara, forvardera i dr. harvestora), koja predviđa izvoz i korištenje i ostale biomase (grane, iglice i sl.), gdje bi se obilježavanje šumskim čekićem, obrojčavanje i premjeravanje vršilo na šumskom stovarištu“.
- (2) Dosadašnji stavovi (2), (3), (4), (5), (6), (7), (8) i (9) postaju stavovi (3), (4), (5), (6), (7), (8), (9) i (10).

Član 4.

(Izmjena i dopuna člana 46. Zakona)

U članu 46. stav (1) iza riječi „električnih vodova“, briše se interpunkcijski znak zarez, a dodaju se riječi „i pristupnog puta“, a ostali dio teksta ostaje nepromijenjen.

Član 5.

(Stupanje na snagu)

Ovaj Zakon stupa na snagu osmog dana od dana objavljivanja u „Službenim novinama Zeničko-dobojskog kantona“.

Broj:
Datum:
Zenica

PREDSJEDAVAJUĆI SKUPŠTINE

Ćazim Huskić

O b r a z l o ž e n j e

I USTAVNI OSNOV

Ustavni osnov za donošenje ovog zakona je član 37. stav 1. tačka f) Ustava Zeničko-dobojskog kantona.

II RAZLOZI ZA DONOŠENJE I OBRAZLOŽENJE PRAVNIH RJEŠENJA

Poslanik u Skupštini Zeničko-dobojskog kantona, Jasmin Duvnjak na 14. sjednici Skupštine Zeničko-dobojskog kantona, održanoj dana 30.09.2019. godine, uputio je poslaničku inicijativu za dopune člana 13. stav (1) i člana 17. stav (1) Zakona o šumama („Službene novine Zeničko-dobojskog kantona, broj: 8/13 i 1/15), na način da se u članu 13. stav (1) iza riječi „pravna lica“ dodaju riječi „i fizička lica“, s obzirom da postoji sve veća potreba za izvođačima radova u šumarstvu, jer je općepoznata činjenice da je povećan obim sanitarne sječe koja se mora u što kraćem roku izvršiti, a posljedica je elementarnih nepogoda koje su uzrokovale pojavu sušenja i obolijevanja stabala u šumi. Poslanik je predložio i dopunu člana 17. stav (1) Zakona o šumama na način da se iza riječi „premjeri“ dodaju riječi „izuzev ako je Projektom za izvođenje radova predviđena upotreba savremene mehanizacije (žičara, forvardera i dr. harvestora), koja predviđa izvoz i korištenje i ostale biomase (grane, iglice i sl.), gdje bi se obilježavanje šumskim čekićem, obrojčavanje i premjeravanje vršilo na šumskom stovarištu“.

Na prijedlog Ministarstva za poljoprivredu, šumarstvo i vodoprivredu Zeničko-dobojskog kantona, Vlada Kantona donijela je Zaključak broj: 02-02-17286/19 od 22.11.2019. godine kojim je prihvaćeno Mišljenje Ministarstva broj: 05-1-26-14855-2/19 od 08.11.2019. godine, po predmetnoj inicijativi poslanika Duvnjak Jasmina, te je Zaključak sa Mišljenjem upućen u dalju skupštinsku proceduru.

Ovom inicijativom, pored pravnih lica registrovanih za obavljanje djelatnosti u šumarstvu, daje se mogućnost i fizičkim licima (obrtnicima) za obavljanje djelatnosti u šumarstvu, iz razloga što Javno preduzeće „Šumsko-privredno društvo Zeničko-dobojskog kantona“ d.o.o. Zavidovići nema dovoljno radne snage i mehanizacije da bi pristupilo radovima sanitarne sječe na svim površinama, čime dolazi u situaciju da krši propise iz oblasti šumarstva i plaća prekršajne kazne, a zaražena stabla ostaju u šumi i predstavljaju dodatnu opasnost za još veće štete. Predloženom dopunom odredbe člana 17. stav (2) Zakona o šumama bi se omogućilo da na se lakši i pravilniji način uspostavlja i održava šumski red, kao i bolja produktivnost i iskoristivost bio mase u radu sa žičarom, forvardom i drugim harvestorom, a time bi se omogućio izvoz dijelova stabla sa granama koje bi se odstranile na kamionskom putu i preradile u sječku, što bi ujedno dovelo do povećanja iskorištenosti biomase (drvene mase).

Obzirom da se u šumi i šumskom zemljištu u državnom vlasništvu nalaze izgrađeni pristupni putevi za nesmetano gospodarenje šumom i šumskim zemljištem, da je odredbom člana 5. tačkom e) Pravilnika o uslovima i načinu davanja šumskog zemljišta u zakup i uspostavi prava služnosti („Službene novine Zeničko-dobojskog kantona“, broj: 3/14), propisano da se na šumskom zemljištu može uspostaviti pravo služnosti puta izgrađenog u šumi i šumskom zemljištu, ovo Ministarstvo predlaže izmjenu i dopunu člana 46. stav (1) Zakona o šumama.

U skladu sa članom 140. Poslovnika Zeničko-dobojskog kantona-Treći prečišćeni tekst („Službene novine Zeničko-dobojskog kantona“, broj: 14/18 i 18/18-isp, 7/19 i 7/20), predlaže se upućivanje Prijedloga Zakona o izmjenama i dopunama Zakona o šumama u skupštinsku proceduru po skraćenom postupku, u formi prijedloga, s obzirom da se ne radi o obimnom i složenom propisu.

Na Prijedlog Zakona pribavljena su mišljenja: Sekretarijata za zakonodavstvo Zeničko-dobojskog kantona broj: 03-02-615-1/21 od 13.01.2021. godine, Ministarstva za pravosuđe i upravu Zeničko-dobojskog kantona, broj: 06/04-1-30615-1/21 od 15.01.2021. godine i

Ministarstva finansija Zeničko-dobojskog kantona, broj: 07-02-615-2/21 od 11.01.2021. godine.

III FINANSIJSKI EFEKTI

Donošenje Prijedloga Zakona o izmjenama i dopunama Zakona o šumama neće iziskivati izdvajanje dodatnih finansijskih sredstava iz Budžeta Zeničko-dobojskog kantona, odnosno donošenje Prijedloga Zakona nema nikakvih finansijskih efekata po Budžet Kantona.